

## ESSAY

Thupui: **Ka hmathlir- Eiruk awm lo Mizoram.**

**Vanlalmalsawma.**

**R.S Hostel,**

**Ramrikawn.**

**Email :**

**Phone Number : 9774636439.**

**7085360171.**

*Note: Total number of words 6951, according to microfoft word 2013.*

## **Ka hmahlir- Eiruk awm lo Mizoram.**

*Eirukna hi khawvel ramtin hian kan nei vek mai a, kan buaina ber a ni theuh hlawm, Mizoram tan pawh hian kan buaipui ber pakhat leh kan mu tan a ni. Nuaibo theih emaw umbo theih niin lang lo mahse, controll theih a ni a, ram changkang lo (third world countries) apaingah a nasa hle thin. Hmasawna daltu anih dan leh ram leh hnam hmelma anih dan chu kan hre theuh a, kan nih tur ang min nihtir thei lo tu a ni. Mizo tawnga "eiruk" saptawnga "corruption" hi mizote nunah hian a mikhual lo hle a, kan hre tlang viau mai, kan nitin nun nen pawh a in chiahpiah nasa hle.*

*Eiruk kan tih hi nihna, thuneihna, lalna, mahni hlawk leh hamthat nana hman luihna hi a ni. Eiruk (corruption) kan tih hian pawisa eirukna hi kan rilruah a lo lang nghal mai thin a, a hluar ber leh min nghawng nasa ber pakhat a ni reng a ni. Nimahsela, pawisa chauh nilo in, hun eirukna, thuneihna eirukna, rilru chhe tak leh diklo taka kan tih hrim hrim hi a huam vek a ni.*

*World Bank-in a hrilhfiyah dan chuan "Mimal hlawkna atana sorkar thil leh thuneihna hman (use of public office for private gain) tih a ni a.*

*Pi Indira Gandhi chuan "Thuneihna hmansual (misuse of power)" tiin a sawifiah bawk.*

*Pu Buanga chuan, "rintlaklohna, inngahna atana tlaklohna, mahni hmasaialna, huamhapna, rinawmllohna" tiin a sawifiah.*

*Philosophy, ethics leh sakhuana atangte pawhin hrihhfiyah a ni a, a kawh tum chu a in ang tlangpui tiin a khaikhawm theih ang. Theology atanga eiruk (corruption) hrilhfiyahna hi a zau hle a, chhia leh tha hriatna hmangsual lui, dik leh dik lo, tha leh tha lo, mawi leh mawi lo hre reng chungga ti dik lo, tha lo, mawi lo zawk thlan luihnate hi a ni.*

*Eirukna kan tih hian sorkar pawisa tham ringawt a kawk lo a, kan nitin nun atanga intanin, a bul ber chu kan thinlung zawk hi a ni.*

**Eiruk awm lo Mizoram.**

He rawtna leh hmahlirte hi, awlsam taka puitlin chi nilo mahse, thil tih theihloh tawp chu a ni lo ang. Kan behchhan kan dante pawh mihring siamchawp ve bawk a ni a, India Constution pawh vawi tam tak amend a ni tawh a, a that tawklohnaiaiah tihdanglam zel a ni bawk. Amaherawhchu thil hote anga kan ngaih pawh hi a takah chuan a lo harsa viau bawk thin a, chuavangin heng rawtna/hmahlir te hi thil tih theih loh ni lo mahse ,awlsam taka hlawhting tura beisei chi chu a ni hauh chuang lo ang. Kan damna tur atana doctor-in damdawi min chawh pawh a thlum vek lo a, a khak chang pawh a awm thin angin, eiruk awmlohna tur a tana hmalakna kawngah kan damdawi ei tur pawh a kha in, lem a har ngei dawn a ni.

Eiruk a awmlohna tur atana ka hmahlir (ZO RAM THAR) thenkhatte:

**Administrative Reforms and Administrative accountability:** Dan leh thupek kengkawh tute leh dan siamtute hi mi pawimawh ber an ni, uluk tak, dik tak leh roelna tha tak hnuaia ro an rel chuan ram hi a hlawhchham theilo tluk a ni. Dan leh thupek kengkawh tute hi eiruk awm loh nan a mawhphurtu lian ber an ni. Dan leh thupek kengkawh kawngah Mizoram hi a thanharh chuan 'Roelna dik' hi luipui angin a luang ang a, Mizoram mipui hausa ber atanga rethei ber thlengin chu lui tui chu kan chawi thei tawh ang. Chutih hun chuan roelna pakhat hnuaiaiah, mitin tan hlawhtlinna kawng a inhawng ang a, kan hlawhtlin leh hlawhchham chu kan thu a ni tawh mai dawn a ni. Administrator tha tak kan neih hun chuan thil engkim hi a fel thlap tawh mai dawn a, insawipui, indilpui leh thil diklo taka ti thinte tan hmun a awm tawh dawn loh vangin, dik taka thil tih a ngai tawh ang, eiruk ching an chep ang a, an nun khawchhuah nan dik leh fel taka an tih a ngai ve fo tawh ang, chutih hun chuan ramin hma a sawn ang a, ram felfai leh changkang kan lo ni tawh ang. Thil engkim a awmna hmun turah a awm tawh ang a, eng thil pawh a awm lohna turah a awm a nih chuan mualphoin, a langsar hle tawh zawk dawn a ni. Administration felfai leh dik taka kalpuina chuan kan ngaihtuah thlen phak aia sang ramah min dah ang a, khawvel hriatah mizote chu phochhuah kan ni tawh ang. Mi tam takin Mizo nih an chak tawh zawk a nga, mi hmingtha leh milarte pawh "Mizo a ni e" kan tih a ngai tawh lo ang. "Mizo ka ni e" an ti tawh zawk dawn a ni.

**Mizoram Land Reforms:** Eiruk tam tak awmna chhan hi kan ram neih dan dik loh vang a ni. Ram enkawl dan dik lo hian mipui rahbehna a thlen mek a, kan ram neih dan kan ennawn a, kan tuaithar a tul hle. Mizoram zau zawng 21087sq km aia zau lehkhah kan nei tawh ti a, a hre zawkte sawi a awm fo. Kan Land System dikloh vangin kan tuar mek a, ramri chungchang leh ram in pek thuah chungchang pawh sawi tur a awm. Mawhphurtu chu tupawh ni se, a changtu department kan tan a ngai hle ni. Mi hausain ram an lei duai duai a, kan density 52 person/sq km thawl takah hian mirethei tan "ka ram" tihtur a awm ta lo, hetiang renga kan kal chuan kan hmabak a ropui viau lo. Tihdan tha zawk leh kalphung tha zawk kan ngaihtuah vat a tul a, chung zinga pawimawh tak chu 'Mizoram Land System' mumal leh fing tak siam hi a ni.

Chumi hnuaiah chuan 'Land ceiling' siam a ni ang a, mi pakhat tan ram zau tak tak neih duah khap a ni tawh ang. Mi harsa leh rethei zawk tan ram theh a ni ang a, hei hian hausia leh rethei inkar zau lutuk tur a veng bawh dawn a ni. Hemi dan hnuaiah hian hausia zawkte pawhin rethei zawkte an rap bet thei tawh lo ang a, mi harsaleh rethei zawkte pawhin he 'Mizoram Land System' hmang hian lei rem kan rap thei tawh ang. Chutin eirukna, hlemhletna nuaibona tha tak a ni dawn a ni.

**Computerization of Land :** Hemi hnuaiah hian Computer softwate changkang tak hmangin sorkarin mitin ram neih chu felfai takin a lo chinchhiah tawh ang a, an neih zau zawng, a hmun, a hlutna leh a dangte thlengin fel takin a chhinchhiah vek dawn a ni. Hei hi a tangkai hle dawn a, compensation leh chhiah pek dan thlengin nghawng a nei ang. Eng development hna pawh, ram lak thu hlaah compensation tana kan sum thehchhuah tam tak a ti tlem tawh dawn a ni. Ram neitu dik tak chauhin compensate a la tawh bawh ang. Development hnathawhna tura ramlakah pawh buaina a tlemin hna a sawt zawt tawh dawn a, project reng reng a hlawhchham tawhlo ang. Compensate sem dawn vanga ram neilo rawn pung ta hluai pawh nuai bo a ni tawh ang. He kan land system hian Mizoram hmasawna turin rah tha tak a chhuah ngei dawn a, 'Mizoram Land System' hmang hian dik takin eirukna tel lovin ram kan kaihrui thei tawh bawh ang.

**Chhiah lak dan thar (Tax System):** Ramtin changkanna hi chhiah lak danah a innghat thui hle, chutih laiin lak tam leh tlem lak lutuk a pawl ve ve thei bawk. Mizoramah pawh 'Income Tax' neih ve rawtna hi inhnialna pakhat a ni mek a, tribal tan 'tax exemption' kan hlawkpui zawkna pawh tam tak a awm ang. Income Tax lak ve mai hi dan ang tak chuan tih theih mai pawh niin a lang lo. Nimahsela, eiruk control nana tha ber zinga mi chu income tax neih hi a ni ve bawk. Kan chhiah lakte hi a la theuneu deuh a, chhiah petu mipui lam pawh kan la pachhe viau. Hengte avang hian duh angin chet a harsa thin.

Hmathlir: Constitution lamin ziah dan leh rem tih chin nei bawk mahse, mi zawng zawng tan chhiah lak a ni tawh anga, mipui phurrit nilo tawkin chhiah lak a ni tawh ang. Income tax, property tax etc hi 'Progressive Tax System' anga lak niin, income hniam lam tana phur rit nilo tawkin chhiah lak a ni ang a. Mimal sum leh pai hi a kip a kawiin hriat theih ni lo mahse, hmasawn hnathawhna tur 'tax' atan chuan eng emaw chen hi sorkarin a hria ang. Sum neih leh lakluh milin tax lak a ni dawn a, hei hian diklo taka sum chhehrelh leh eiruk a veng tawh ang. A nei tam deuhin an pe tam deuh ang a, sum lakluh mila pek a nih tawh dawn vangin kan thil neih hlut zawng chiang taka hriat a ni tawh bawk ang. Chhiah awlrak leh thil neih pung thut pawh awlsam zawka man chhuah theih a ni tawh dawn a ni. Programme/policy/project reng rengah a tangkaiin sualna tam tak manchhuahna leh venna a ni nghal bawk ang. Income phulo a hausate chu awlsam zawka chhuichuah theih an ni tawh dawn a, chhiah kan pek dan atangin kan sum lakluh zat a chhutchhuah theih vek tawh dawn avangin, sorkar hnathawk tan phei chuan an sum lakluh leh chhiah pek tur zawng zawng an service chung zawng atan pawh nise chhiarkawp danin harsa lo takin a chhut chhuah theih tawh ang. Kan sum lakluh dan leh neih dan zira chhiah kan pek chuan sorkar revenue a tihsan piah lamah eiruk control-na tha tak a ni nghal dawn a ni.

**Moral Reforms:** Kan ngaihhlut zawng hi a dik tawklo fo thin, pawnlam hmuhtheih ropuina lem ringawt kan ngaisang a, in ropui changkang leh lirtθειin kan in tlansiak a, chhungril lam nun hlutna leh belhchian dawlna lam aiin pawnlam lan ropuina kan ngaihlu a, hei hian eirukna lamah nasa takin min hnuk hnai. Chuvangin thil dik leh tha hmuhtheihloh lam thlenga kan ngaihhlut zawng kan thlak theih nan,

kan hringnuna zirna in hmasa ber chhungkua atangin bul kan tan a ngai. Eiruk nuaibo nana pawimawh tak pakhat chu mipui sukthlek siamthat hi a ni.

Kan thil thlir dan (attitude) hi a tha leh chhe zawnga siam danglam theih a ni a, kan hlawk tlanna tura mipui sukthlek siam that hi hlawnm lian tak tak pahnih:- formal education leh informal education hmanga siamthat theih a ni. Kan awm hmun leh ram zirin kan thil ngaihhlut zawng leh kan zia a danglam fo va, thiam sa a piang lo; zirtir ngai mihring kan nih vangin a bul thut atanga inzirtir hi a tangkai hle ang.

Hmathlir: Kan inzirtirna a that tawh dawn vangin mizote chu kan standard em em tawh dawn a, ngaisan tur leh ngaihhlut tur dik kan hre tawh ang. A dera nun leh nun thalo kan bansan tawh dawn vangin 'Kohhrana inhman aiin Pathian tih mi' kan pung bawk ang a, hei hian kan nitin khawsak phungah nghawng a nei thui hle dawn a ni. Hnamdang/ramdang hmuhah kan hmel a mawiin a tha tawh dawn a. Hei hian chhungkua leh khawtlanga kan buaina tam tak (heng zurui buaina siam thin, KS, tleirawl hawklak, AIDS, adt.) hi kan nei tawh lo ang. Kan hna theuhah kan buai tawh ang a, mahni hna theuh tha taka thawh chu kan inelna a ni tawh ang. Kan moral dik chu kan hmel mawina a ni tawh ang. Khuavelah Mizoram hi a chhe zawnga lar tawh loin a tha zawngin a lar tawh zawk bawk ang.

**Hna zawng zawng Comission/Board kutah:** MPSC din a nih a, hna lian deuh zawng zawng a kutah an awm hi tun dinhmuna mipui mimir ina kan hlawkpui ber a ni hial awm e. Hna reng reng contract chenin a sang ber atanga a hniam ber thlengin dik leh fair takin Commission/Board mumal taka siamin a la vek tawh ang a, a thiam leh tlingte chauh an lut tawh ang. Eng hna pawh temporary chenin dik taka lak a tulzia kan hre tawh dawn a, pawlte siama ngheh tuma hma la leh tho thin kan nih vangin, a thiam leh tha lak nghal mai hi kan damna tur a ni tih kan hai tawhlo ang. Zirlai tan lehkha zir man pawh a awm tawh dawn a, thiam tak tak tumin thahnemngai takin lehkha kan zir tawh bawk ang. 'Bhavan List', 'Hnam Run list', political fitness/qualification awm thin a bo ang, mahni thawh rah ngei kan seng tawh dawn vangin zirlaite zingah inelna a sang sawt ang. Mithiam leh tha chauhin hna pawimawh an khawih tawh ang a, nasa takin hma kan sawn tawh ang. MLA-te ina zingkar atanga 'sitting room' a thu a, hna pekloh hlahv vang a thil diklo

*ti tura in thlem leh tlawn a bang ang a, a hahdamthlak hle tawh ang. Mi tupawhin insawipui lam emaw "ka pu hna min pe ve rawh" an tih chuan "MPSC/Board ah va kal mai rawh u' tih a ni tawh ang. Dik tak chauha hnalak a nih dawn vangin eirukna tam tak nuai bo nghal a ni dawn a ni.*

**Rorelna dik leh dan khauh taka lek kawh:** *Mihring thatna leh chhungril lam atanga eiruk duh lohna ringawt hian rah tha a chhuah tawk thin lo fo, chuvangin dan khauh zawk siamin, eiru theilo tur khawpa min phuar kan ngai, mihring thatna leh chakna hi a tawi lua a, thlemnna tlansan dan tha ber chu "thlem theihna hmuna awm loh leh thlem theih loh a insiam" hi a ni. 'Party Base Policy' awm tawh loin, dan tha tak tak roreltuten an siam ang; heng kan dan neih sa Indian Penal Code, 1860, Prevention of Corruption Act 1947, State Vigilance Comission 1964-te leh a dangte; dan kengkawh tuten khawng takin an lekkawh ang, mipuiin dan kan ngai pawimawh theuh tawh ang. Suahsual leh kawhmawhbawl tawk awm bawk mahse, mi tha leh dik rorelna hnuaiah chuan an chep hle tawh ang. Pawi lian tham khawih a harsa dawn a, mi dang lambik chu tlemte bak kan awm tawh lo ang. Kan dan neih reng reng zoram dung leh vangah khauh leh chak taka kenkawh a nih zel tawh dawn vangin rorelna dik chu luipui angin a luang tawh ang.*

**Education Reforms:** *Zirchianna (Research) atang hian education pawimawhzia a hriat lehzual, ram changkang leh daizau zawk apiangin an ngai pawimawh thin. Sum sen tam berna pawl a ni bawk. Kan khawvel hmasawn chhan hi zirna vang a ni, heng - health, information technology, infrastructure etc zawng zawng hi education thanna vang chauha awm thei a ni. Education level hniamna apiangah ram a changkang lo va, eiruk a tam a, mipui khawsak a harsa thin.*

*World Bank-in khawvel ram 192-te a zirchiannaah chuan ram economy thanna 16% chauh hi physical capital (machinery, buildings leh physical infrastructure) vang a ni a, 20% hi leilung hausakna vang a ni, chutih laiin 64% daih hi mihring te thiamna vanga thawhchhuah punna chu a ni tih an hmu chhuak (HRD,1966). He thil hi khawvel ram 192 tana a*

dik chuan Mizoram tan pawh a dik ngei ang. He thilin a entir chu Mizoram hmasawn nana pawimawh ber chu thiamna hi a ni.

Economics of Social Sector tih a, 'The Residual Factor Approach' chuan tiang hian mithiamte research neih atangin ram hmasawanna hi Education-ah a inngah dan an sawifiah. Labour leh capital chauh hi economic growth thlentu a ni lo va, GNP sanna hi residual factor approach-ah thui tak a inngahat niin an sawi. Residual factor approach chuan hengte hi a huam a, "Education, Rresearch and Trainning, economics of scale leh economic productivity tisang thei thil hrim hrim hi" tiin. Robert Merton Solow, American Economist (1960-1980) chuan Economic growth sanna 90% lai hi 'Residual Factor' vang niin, 10% chauh hi labour leh capital-in a thawh ni hialin a sawi. Nimahsela he a zirchianna hi develop countries-ah niin, developing countries Brazil 62%, Mexico 50%-te an ni ve bawk. He thil hian a entir chu ram changkang apiangah residual factor contribution a sang a, changkanglo ah chuan a hniam deuh. Sawiselna (criticism) tam tak awm bawk mahse, education hi develop leh developing tan hian a pawimawh hle tih a lang.

Eiruk tlem tur chuan education mumal leh felfai kan mamawh, Mizoramin khua kan ngah hle a, heng khua zawng zawnga mihring mamawh kawng tha, damdawiin, zirna, power, tui leh a dangte hi sorkar tan neih vek a harsa hle. Mipui sukthlek dikloh chhan hi kan education system (formal and Informal) felfai loh vangah a puh theih, zirtirna dik leh tha min kawhmuhtu aiin a awlsam zawng leh mahni remchang insiamchawpna lamah min beng luttu an tam zawk, he lam hi kan awn lam leh kan inelna pawh a ni. Zirtirtu kan lak dan, kan syllabus siam dan leh school kan din dan atang reng hian a-bil-ah kan tho tawhlo a, smart phone hum theuh chung siin, a neitu lam smart chuang silo ang kan ni.

Hmathlir: Dik leh felfai taka hna lak leh rorel anih tawh dawn vangin zirtirtu reng reng an lakchhan leh awmna turah an awm tawh ang, zirtirtu tha school tinin kan nei tawh bawk ang, tin, zirtirtu tha chuan, zirlai tha a siam ang a, zirlai tha chuan khawtlang leh ram tan rah tha a chhuah ngei bawk ang. Kan education system a dik tawh dawn vangin mithiam tam tak kan nei tawh ang a, chungho chuan thahnemngai taka hna thawkin chhim leh hmar tawp thleng phak hmasawanna kan nei tawh bawk ang. Kan thiamna chu mahni tan chauh ni lo, midangte tan a luangchhuak tawh bawk ang. Chutih hun chuan mi dik tan hmun siam

a ni ang a, dik lote an chep thung tawh ang. Dik taka thil tite hi mi a tia sawi an hlawh fo va, nimahsela, zo ram tharah chuan mi dikte chawimawi an ni ang. Kan buai thinna leh rual kan awhna heng All India Service, Central Servive lamah pawh lut kan thahnem tawh dawn a, mahni a ram ro in rel in kan ram hi kan enkawl tawh ang. Thenawm state-te kan awh a bang tawh dawn a, min awt let tawh zawk ang. Education vanga hma kan sawnna chuan mizote hmai balh thinna a phih fai ang a, zirthiamna ina a ken tel chi hrang hrang heng thuawihna, thiamna, finna, dawhtheihna, dikna, takna, tlawmngaihna, aia u zawkte zah thiamna, remnate leh thil dang tam tak kan awh leh beisei thinte chu kan nei tawh ang. Chutih hun chuan kan smartphone angin kan smart tawh bawk ang, hlemhletna a tawmim ang a, eiruk awmlo Mizoram kan siam thei tawh dawn a ni

**Sorkar chanchinbu siam a ni ang:** Mi pakhat atang chauha eiruk hi thil tih theih reng a nih loh ang bawkin, a siamthat kawngah pawh mitin kan thawh ho a ngai. Mipui thlawpna tak tak tello chuan nuaibo theih a ni lo. Chuvangin sorkar hmalakna, hmachhawp, hnatlawh tawh leh la thawh loh hrilhfiah leh hrilhhriat hi sorkar mawh a ni. Sorkar hmalakna thehdarh hi sorkar chakna a nih vangin information thehdarhna tha tak chu chanchinbu/T.V/internet-te hi an ni.

Hmathlir: Sorkar chanchinbu siam a ni ang a, department tam tak mahni bila sum tam tak senga 'Magazine' siam thin chu tangkai zawkin chanchinbu lamah suan niin, sorkar thu pawimawh leh mipui hriat ngai kartinin Mizoram dung leh vangah chhiar a ni tawh ang. Information mai bakah thu tha tak tak officer leh mithiamte ziah chhiar tur a awm bawk ang. Sorkar thil pawimawh tam tak kan hriat bakah kan zawhna tam tak chanchinbuah chhan a nih tawh dawn vangin awmze nei lova inhnialna tam tak tih bo a ni ang. Thawktu department lam leh politician tan pawh awmze nei zawka hnathawh a chakawm sawt dawn a, an hunchhungin mahni hmingchher nan thahnemngai takin hna an thawk thei tawh ang. Langtlang (transparent) takin mipui hnenah sorkar hmalakna thlen zel a nih dawn vangin kan fimkhur tlang hle tawh bawk ang, hei hian eiruk tur nasa takin a veng thei dawn a ni. Tin, sorkar chanchinbua data-te chu mipui/zirlai/ziaktu tan document pawimawh a ni nghal bawk dawn a ni.

**Politician 'Free Role':** Tun hma chuan kan politician ten ven thawn tur an ngah hle a, dipdaltu sual chi hrang hrang an nei tawh dawn lo, mipui tha kan nih tawh dawn vangin eiruk chu sawi loh, thahnemngai takin ram leh mipui tan hna an thawk ang a, ei ru lo tura zirtirtu zawkah an tang ang. Eiru ngailo mi dik a ni tih tih mipuiin kan vawn tlat dawn vangin an lak atanga kan thil beisei pawh a dang daih tawh dawn a, kan thil dil leh an laka kan beisei pawh a inthlak hlawk tawh bawk ang. Politician-ten 'Free Role' neiin an chhia leh tha hriatna thiang tak hmangin ram an kaihruai thei tawh dawn a ni.

**Contract System siam that:** Political party-a lut tam tak hi ram hmangaih vang leh ram siam tum tak tak awm bawk mahse, eizawn nana hman tum a, contract beisei vanga party tana rinawm taka awm hi thil nih phung leh kan thil tih phung a ni. Heng mite hi party tan tangkai viau mahse ramin a tuar hle thung.

Hmathlir: Party lam atangin contract hna thawh control ni tawhlo in, contract hna pe thei Board rintlak leh fair tak din a ni tawh ang a, hna chhia tan hremna awmin; a tha tan chawimawina. Tin, "Registered Contractor" chauhin contract hna an thawk tawh bawk ang. Hna thawh that dan 'grade-a' zirin hna dang zel pawh pek chhunzawm chauh a ni tawh ang a, contract beisei vanga 'Bhavan' leh 'Hnam Run' office a tei tei thinte pawh an bo duak tawh ang. Chutih hun chuan contract hna hralh chhawn leh sum siam nana hman awm tawh loin, hna tha taka thawh niin ram ro tling thil tam tak kan nei thei tawh ang. Contract sem leh beisei vanga eiruk tam tak inphum thin a reh tawh ang a, he system hmang hian contract hna chhia chinfel a ni tawh ang.

**Retheihna umbo a ni ang:** Khawtlang sualna tam tak rukruk, inthah, pawngsual leh thildang tam tak thlenna chhan hi retheih vang a ni. Mihring hi dinhmun chhiat leh beidawn vangin sualna tam tak a ngaihtuahin a tih phah thin a, nun ve reng duh si a, mamawh neih chuan siloh chuan duhthlan tur awmchhun chu sual lama kal a ni mai thin. Chuvangin retheihna hi umbo a tul takzet a, mi thiam zawkten "Poverty is a Social Evil" an lo ti thin reng a ni.

Hmathlir: Mipui nawlpui tan khawsak leh ngaihtuahna a sang tawh dawn a, ram roreltu tha leh mipui tha chuan ram dinhmun pawh sang

takah a vawrh ang. Kan budget leh project reng reng dik leh tha taka umzui leh bawhzui a ni tawh dawn a, Mizoram pum huap hmasawna a thlen tawh ang. Chhung tin thleng 'budget' kan nei tawh ang a, thingtlang kilkhawr ber thlengin kan budget sumin kan fai-rel-bel a nghawng phak tawh ang. Thingtlang lam ngaisak bik kan nih tawh dawn vangin kan tharchhuah thlaithar man man zawka hralhna turah kan sorkar chuan kan tan nghet takin min din sak ang a, taimak man pawh a awm hle tawh ang. Chutih hun chuan tumah kan thatchhe phal tawh lo ang. Chhung tinin hma kan sawn tawh ang a. Politician leh sorkar officer hmelhriat tha neih leh intlawnsiak a ngai dawn tawh lo, taimakna chauh chu kan mamawh leh kan ram kulhbing a ni tawh ang. Chutin retheihna chu kan umbo tawh dawn a ni.

**Transfer leh Posting:** Kan Chief Minister-in zirtirtute chungchang a sawinaah thingtlang lama zirtirtute an in daihlo em em lain han sawna han semzai tak tak dawn chuan insawipui leh intihpui hlira kan buai thu a sawite leh a thusawi tifiyah tura 'insawipui hnam kan ni' an ti tawp mai te kha a zialo hle.

Hmathlir: Roreltu tha leh system tha kan neih tawh dawn vangin midangte zarzo tum leh phakar taka chetlakna a bo tawh dawn, Department officer-te pawhin dik takin Mizoram tana tha thei tur ang berin transfer and posting chungchangah pawh thu an nei tawh ang. Politician-te leh mi inti vei an inrawlh tawh lo ang a, sorkar duhna hmun takah hnathawktute an awm thei tawh ang. Sawinawi ching, phunchiar leh hotute kherh ching an bo duak tawh ang a. Mitin kan awmna hmun turah hna kan thawh tawh dawn vangin, kan 'production' leh 'productivity rate' a tha hle tawh dawn a ni.

**Kalhung tha (Good Governance) kan nei ang:** Sum tawngpawng sem ngawt a bo tawh ang a. Politics changkang kan nei tawh ang. Criminal case nei, election commission-in election-ah in candidate a remti tawh dawn lo a. Ram hruaitu lu ber 'Chief Minister' hi mi pakhat tan kum 10 bak chelh a rem tawh lo ang. Hei vang hian an hun chhungin hmingchher tumin nasa takin hna an thawk zawk tawh dawn a ni. Hun tam an neih tawh dawn loh vangin nasa taka an beihna chuan rah tha a

chhuah ngei dawn a, kum 10 hi rei lovin lang mahse, mihring theihna phochhuah nan chuan a tawk viau tho dawn a ni.

**Dikna tan ngam mipui:** Eiruk sawi a pianga politician-te mawhpuh thin chu mipuite hi kan ni. Beisei nei, zah dawn zo lo, eiru mai tura politician-te thiam taka kar thintu chu mipuite kan ni thin. Kan hmuhphakah pawh VC/Local Council-te hi thil dik chiahlo ah hming ziah hnan turin kan ngen thin. Gas sem naah te, ruang phurh leh damlo kan te, mitthi ral leh mikhual thlen chhungchangah te, kohhran leh NGO mamawh puhru tur te a kan beisei chhung hi chuan eiruk nuai bo hi chu kan beisei thei lo ang. Sawi hlawh tak zinga pakhat chu MLA pakhat chu a hunlaiin a lawina kohhrana pawl pakhatin contract an dil ve a "kohrana pawl pakht tan kan 'plan' pawisa hi alo kal ngai lo a" tiin a lo chhang a, an sawichhe zui chiam e an ti.

Kan hruaitute an thuneihna hmangsual lo turin kan venpui tawh ang a. Thawh loh hlawh laka sum neih ai chuan mahni thawhchhuah ngei kan ngaisang tawh zawk ang. Kan ngaihsan zawng thlakin, thawhrim vanga dingchhuakte chu kan 'idol' an ni tawh bawk ang

Hmathlir: Education kan ngaih pawimawh tawh dawn vangin thiamna sang tak leh hriatna tak tak kan nei tawh dawn a, mipui mimirin dikna kan tan tawh ang. Kan ze tha lo paihin, thil tha lam kan in zirtirin kan zawm tawh zawk ang a, mi tha ngaihlut nachang kan hriat tawh dawn bakah mi dik leh rinawm ten parthi an awrhin hrem ngai hrem zel an ni ang. Dikna tan tlatin, chutin rorelna dik chu luipui angin a luang tawh ang a, eiruk awmlohna ramah Mizoram chu kan siam tawh mai dawn a ni. Politician/officer intlawnsiak tawh loin, kan in chawimawi siak tawh zawk bawk ang.

**Dan leh department hman tangkai:** Eiruk tam chhan chu sorkarin dan khawng taka a lekkawh zawh thin loh vang a ni. Kan dan neihte hi eiruk nuaibo nan a tha tawk viau a, kan harsatna chu tha taka dan mila lekkawh thei ram hruaitu kan tlakchham thin vang a ni fo. Dan hi hman tura siam a ni a, sorkar hnathawkte hnathawh dan enfiah turin Anti-Corruption Bureau (ACB) a awmsa reng a, hei chauh pawh hian tih tak

zetin hna thawk se chu kan harsatna tam tak hi sutkian theih a beiseiawm.

Zo ram thar chuan dan a ngai pawimawh dawn a, dan tha tak tak awmsa bakah lar tak tak eiruk veng tur Lokayuta, ACB, Administrative Tribunals, Vigilance Commission-ten hna tha takin an thawk tawh ang a, court leh department lamin chak taka bawhzui zelin, khawi emaw laia pawl leh mimal thil ti thei ten an duh thu leh tha an tih dana ro a hrana lo rel a, dan siamchawp a remti tawh dawn lo. India ram hi sakhaw zalenna ram a nih angin, khawi emaw hmun thenkhata khua/vengin dan phuahchawp siama chumi chu kan vengah an awmthei lo ang tih emaw, chumi kohhran chu din kan phal lo tih te, mimal dikna leh zalenna rahbeh a rorel a ni tawh dawn lo a, dan chungah leng si loin, dan hnuaia leng khua leh tui tha kan ni theuh tawh zawk ang.

**Tangka sum ngaina lo tura zirtirna:** Bible chuan tangka sum ngainat/hmangaih lo turin min zirtir a. "Tangka sum ngainat hi soal tinreng bul a ni" a ti tawl bawk. Sum ngaina lo tura zirtirna hi Lal Isua thusawiah te, Hebrai mite hnena lekhathawnahte, Tirhkoh Paula thusawiah te kan hmu a, a bawiha tan hlauhawmzia min zirtir chiang hle. Sum kan ngainat vanga kan buaina hi a nasa ta hle mai a, kan buaina leh kan ram hmelma eirukna pawh hi sum ngainat luat vang a ni. He awhna soal hi sakhua leh education nena tang kawpin, a nghawng leh nihphung zirtirna hnuaiah kan control thei ang.

Hmathlir: Thil reng reng a hlutna atana kan tehna pawh sum ni tawh lo in, kan ngaihhlut leh tha kan tih zawng pawh kan thlak tawh a nga, kan thinlung ngaihtuahna thiang tak kan hman tawh dawn vangin soal tinreng bul 'sum bawih' ata kan talchhuak tawh ang. Chu chuan nasa takin kan inchhung, khawtlang leh ramah nghawng a nei ang a, chunglam atang pawhin van Pathianin mal min sawm bawk dawn a ni.

**Mizo rinawmna tihchak leh tihzau:** Prof. F.S Downs hi North east India-a tlangmite nunphung (culture) leh sakhua uluk taka zirtu a ni a. Rinawmna chungchang sawi a, tribal-ho rinawmna chu an ram chhungah chauh a ni. Mizo chu mizo chungah an rinawm hle a, mahse hnamdang sap emaw vai chungah an rinawm vak lem lo, a ti.

Hmathlir: Kan khawvel a zau zel a, mizote pawhin kan huang kan zauh zel ang, hla siamtuin "mihring chauh lo chu zirtir kan ngai lo" a tih angin, zirtir ngai mizote pawh hi hmun tin kil tin atanga thil tha zirtir leh hmuhtir kan nih chuan kan khawhawi lo zauin kan lo changkang ang a, kan thatna leh rinawmnate pawh mizo zingah chauh ni lo, hnamdang zingah pawh a parvul tawh ngei ang. Chutin kohhran leh khawtlanga kan rinawmna chuan sorkar pawh a thleng tawh ang a, kan Pathian thu awihnate pawh biakin chhung leh a vel ah chauh ni lo, kan nitin nunah nghawng a nei thleng tawh ang. Mizo thatna leh tlawmngaihna chuan khuavel a deng chhuak dawn a ni.

**Nun lem atangin nun tak ah:** Kristianna hi enge anih tih hi kan zir thar leh a ngai. Kan nun leh thil tihah a lan leh chuan si loh chuan Kristian kan ni lo. A derin kan nung a, mi hmuha that leh mawi tumin kan in pel suau suau tihna mai chauh a ni. "Kohhrana inhmang tak a ni" tih aiin miten Pathian tih mi tak a ni tiin min hre zawk se, hma kan sawn phah zawkin a rinawm.

Hmathlir: Bukna dik tak hmangin thil engkim kan buk tawh dawn a, khawvel lam thil ni lo Pathian atangin tehna kan lak zel tawh dawn vangin, chu tehna chuan mitin min ti danglam ang, kan nun lem atangin nun tak leh nun duhawm zawk kan nei tawh ang.

**Procedural simplification:** Ram inawpna a thil inchherchhuan tul lem lo tam tak pah bo a ni ang a, lehkha kal reng reng tha leh simple thei ang berin, dawhkan pal tlang tam si lo rintlak si hmanga thlak a ni tawh ang. Hnathawktu a mamawh tlemin sum renchemna a ni nghal dawn a, mipui tan awlsam hi, hun reilo zawkah hna tam zawk kan ti thei tawh bawh ang. Mi mawlte tan pawha hriatthiam theih, awlsam niin, chhuizui thlengin a awlsam dawn a, mipui tana phurrit tam tak siam thin tih ban a ni ang. hei hian kawng tam taka eirukna pawh a ti tlem bawh ang.

**Decentralization:** Mithiam tam takin tunlaia an tuipui em em, mi tam zawkin khawtlang leh sorkar thua aw an neih ve theihna tur 'decentralization policy' hman a ni tawh ang a. He mi hmang hian bung thar kaiin, zoram dung leh vanga mi zawng zawng tan ram rorelnaah tel

ve nun kan nei thei theuh tawh ang. Kan veng/khua a kan harsatna tam tak chu thuneihna semzai (decentralization) hmang hian chinfel a ni tawh ang a, decentralization chi hrang hrang heng political, administrative, fiscal, economic/market decentralization hmang hian ramin nasa zawkin hmasawanna a nei thei tawh ang.

**e-Governance:** e-Governance hman tangkai ni tawhin, rei tak tak office dawr tura intlar leh intham a awm tawh lo ang. Tunlai thiamna Information Technology (IT) hmangin thil engkimah hmalak a ni tawh dawn a, chu chuan awlsam zawkna thlenin, mipui bawkin kan tangkaipui ang. Computer hmangin thil engkim tih a ni tawh ang a, hei hian sum faia hmanna ti boin, thil thalo awhna soal lakah min veng ang. Langtlang (transparent) taka thil tih a nih tawh dawn vangin IT hian kawngro a su hle bawk ang. Hei hian sorkarah simple, accountable, responsive & transparent, self explanatory-te a keng tel ang. Mahni inlum atangin kan hun neih milin awlsam takin office kan dawr thei tawh ang a, sum leh hun hlu tak renchemna a nih mai bakah, langtlang sawrkar siamna pawimawh a ni ang. Chutih hun chuan kan 'smart phone' angin 'mipui smart' tak kan ni tawh ang a, chu chuan 'smart government' min thlen ang.

**Hmasawanna kawng tinrengah kan nei ang:** Khing a chung a kan sawi zawng zawng khi mizote ta a nih tawh dawn vangin, ram pawn leh chhung atangin company lian leh mi thiltithe tak takin project tam tak neih an duh tawh dawn a, diklo taka tithinte a umchhuak thung ang. Hmasawanna tak tak thlen tura sorkar a inkau ang chiahin mipuite pawh kan inhawng dawn a, mithiam tak tak ruahmanna leh enkawlina hnuaiah kan sawi fo thin "basic needs" tih puitlin a ni tawh bawk ang. Bank lam pawhin kan rinawm a ni tih hriain loan-te pawh min pe chhuak chur chur tawh ang a, mahni awmna hmun theuhah ram hmasawanna hnuk kan ni tawh dawn a ni. Kan mithiamte'n hmasawanna tha thawhin ngaihtuahna an seng tak tak tawh ang a, chutih hun chuan thenawm state-ten dingdihlipin min thlir tawh ang. Hmasawanna chu hmun tinrengah hmuh theihin a awm tawh ang a, chu hmasawanna chu eng tianga lo awm nge tia zawhna a awm chuan "eiruk awmluh vang a ni" tiin inchhuang takin kan sawi thei tawh ang.

Heng point zawng zawngte hi kan neih hun chuan ramtin, mitin nghahhleh "Good Governance" chu Mizoram ngeiah kan nei thei tawh dawn a ni. A thatna zar zo in; kan la hlimpui hle bawh ang.

Mizoram Kohhran, NGO leh Community tepn Sorkar an tihchak leh tihthuanawp theih dan.

NGO hi chi hrang leh dinchhan hrang theuh nei an ni a, an thil tum leh hmalakna pawh a dang thliah hlawm. Sorkar tan harsatna leh awlsamna siamtu an nih theih dan hrang hrang pawh a awm bawh.

### **Sorkar a tihthuanawp theih dan.**

1. Sorkar hnathawkte hian tlawmngai pawl leh kohhrana nihna kan chelh hian mahni inthiam chawpin kan hna kan tlansan hreh thin lo. Thawhpuite kep a, aiawh lak ngai hial an awm thin. Hetiangah hian sorkar chu ngathiam mai turin kan phut phah fo.

2. Sorkar hnathawh, tlawmngai pawl leh kohhrana inhmang te'n sorkar bungrua kan thawhchhuahpui fo thin, sorkar thil leh bungrua kan hmang hek a, kan hnathawh tur kan ngaihthah a, sorkar sum leh pai a hman lohna turah kan kaltir a, sorkar bungrua kan eiru a ni, kan hun kan eiru tel bawh.

3. Tlawmngai pawl leh kohhranin thil tihkhawm leh programme kan neih in sorkar atangin thil phut leh hamthatna kan beisei thin, ram leh khawtlang hmasawna tur pawisa tam tak, mi thenkhatin pawl mal leh kohhran thenkhat kaltlanga lo pawhpen ching leh tum kan awm thin.

4. NGO-te hian mimal tih luih, nawr luih, danlo deuha kal duh mai chang kan nei thin. Kan kalkhawm leh thathnem vangin dan phuahchawp hmanga rorel mai kan ching, mimal dikna leh zalenna haider a, palzut luih ching kan awm thin.

5. Tlawmngaipawl leh Kohhrante hian inkhawmpui kan nei fo va, heng kan thiltih hi a pui thei ang bera tih kan duh bawh, chumi atan chuan

*pawl sumin a daih seng lo va, sorkar bungrua tam tak kan beisei thin. Mipui punkhawm anih chhuanlama sorkar kar nana hmang kan awm fo thin. Kan sum leh nihna in a tlin tawka kan ruahman thiam a tul hle.*

*6. Sorkar hnathawk tam zawk hi tlawmngai pawl leh kohhran member an nih ve bawk avangin engemaw chenah pawl thurel zawm a tul a, thurel fuh chiahlo leh sorkar thu lam kalh chang pawhin, member-ten an zawm mai thin vangin thu a sai sa thin.*

*7. NGO-ah hian nu leh pa, ckan fate la puitling silo a inhmang kan tam hle a, hei hian chhungkuaah khi a siam thin. Vanduai vanga nu leh pa neilo kan buaipui mek laiin, nu leh pa uap loh fate kan ngah a, chu chuan chhungkua, khawtlang leh sorkar thlengin a nghawng kan tuar leh thin.*

*8. NGO hian sorkar rorelnaah aw an nei thui thei hle a, sorkar hmalakna hrang hrangah pawl thenkhat an hmanhlel hle, transfer and posting chungchang thlengin kan inrawlh duh mai thin. A ni hi kan member a ni a, mi tangkai tak, chuti khati chu a ni e; ti a, harsatna hrang hrang chhuanlamin sorkar kan nawr thin.*

*9. NGO hi mimal thenkhatten politics-a nihna neih nan leh mimal hlawkna tur atan a hmang kan awm thin.*

*10. Pawl kan hlawk dawn vangin dan kalha che tla thin an awm, mahni inthiam chawpin, contract leh supply-te dan kalhin kan dil thin.*

*11. Sorkar committee hrang hrangah tlawmngai pawl leh kohhran aiawh kan tel thin a, heng aiawhtute hi sorkar hnathawk ve bawk an nih fo vangin, sorkar hnathawk tam tak, an thut phak lohna leh thut lohna turah an thu a, hei hian sorkar hmalakna leh committee thu a tih thuanawp chang a awm thin. Tin, tlawmngai pawl leh kohhran kaltlangin sorkar hnathawkten sorkar an nawr chang a awm bawk.*

*12. Midang tanpuina tur anga project siama, mi malin pawl hlawkna tel kan awm. NGO leh kohhran den chhana Project lem hmanga sum fai dawn tumte pawh kan awm thin. Tin, tam lam nih hria a, sorkar thutluka awm sa sut leh tura nawr kan awm chang a awm bawk.*

**Kohhran, NGO leh Community-ten Sorkar an tihchak theih dan:-**

1. NGO-te hian sorkar khalh ngilna kawngah tha a thawh hlawk hle a, khawi ramah pawh sorkar kal sualna laka vengtu pawimawh tak chu NGO-te hi an ni. Sorkar tih tur reltu ni chiah lo mahse a tih loh tur tihpalhna laka vengtu tha tak a ni.

2. Sorkar hi nawr kal a ngaih chang a awm fo thin a, sorkar hmalakna tam tak project muang lutuk te, hna tha tawklo te, sorkar thil tih dik loh leh sorkar mit leh beng tivar turin NGO hrang hrangte hi an pawimawh hle a ni.

3. Mimal harsatna tam tak sorkarin a ngaihsak tawk loh te pawh, NGO hmalak nain sawt zawk leh awmze nei zawkin, NGO hi kan hmang tangkai thei thin.

4. NGO hi sorkar nawrtu an nih rualin, sorkar tan thian tha tak an ni nghal baw, hna thawhna kawng hrang hrangah, sorkar tana tih remlo leh tih theih chiah lem loh te pawh NGO chuan awlsam zawkin thawhhona tha tak hnuaiah a puitlin thei mai thin.

5. NGO member te hi tlawmngai leh inpe tak an nih avangin an pawl harsatna theuh an hrechiangin, an mamawh leh hmasawn theih dan tur an hre ber fo thin. Sorkar chu mipui vantlang tihmasawn tum a nih baw vangin NGO thil neih leh hriatte hi a hman thiam chuan chak taka hma lam panna a ni. Ram tam takin an lo thatpui tawh baw.

6. Inpekna tak tak nei an nih vangin sorkar programme thlen phaklohna tam takah sorkar ai an awh fo.

7. Sorkar hmakhalhtu a ni fo a, rawtna tha zawk neiin, mipui leh sorkar inkarah awmin 'palai hna' a tahawk thin.

8. Kohhran lam pawhin school-te din in, khawtlang tana tangkai hna tam tak an thawk fo a, sorkar chhawk zangkhaitu leh mipui suk thlek ti danglam theitu a ni.

9. Thingtlang hmun kilkhawrah pawh hmalakna tam tak neiin, mipui dinhmun hrechiangtu zawk an ni a, an document leh data-te hi sorkar tan a tangkai thin hle.

10. Mi rethei tanpui, inlungualna, zirna, hriselnate leh vantlang hma sawnna tur hrim hrim kawngah hma lain, hnuailam atanga dawmkangtu pawimawh a ni.

### **Tlangkawm na.**

Hna hrang hrang hi inkungkaih vekin, society tana an pawimawh dan a inang vek a; pakhat a chhiat emaw, a buai chuan a dang a nghawng ve zel thin. A tha lamah pawh chutiang zel chu a ni. Tichuan, hnate hi pawimawh leh chungnung bik a awm lo a, an zavai hian an pawimawh em em vek a ni. Eirukna do tur hian pawimawh bik leh pawimawh lo bik a awm lo, thil engkim hi an in kungkaih vek a; tih hmasak atana tha leh, a hnunning lama tih atana fuh zawk a awm thei thung. Ecological balance ang bawkin kan nitin khawsak phunga kan nun leh tih thin dan heng: kohhran, khawtlang leh sorkar thleng hian a inkungkaih vek a, hnuchhawn theih thil a awm lo.

Tui mal farin tuipui lian a siam angin mi mal tin tanrualna atang chauhin eirukna hi nuai bo theih a ni. Mimal thatna hian awmzia nei thin mahse, rah tha leh nghawng a nei thui viau thei thin lo. Cheng ho, khawsa ho kan nih vangin kan zavaiin kan tan ho a tul takzet a, a chhelai siamthatu kan nih theuh theih chuan eirukna hi Mizoram atangin kan um bo thei ngei ang. Chutin, Eiruk awm lo Mizoramah kan siam tawh bawk ang.

